

膠海講祕密

臨暗頭紅霞紅霞个天色，係一枝水紅色个筆
寫等阿婆个心思，掛在天角
估杖仔牽等稊稊斜个烏影，來海脣
踏入沙圍留下一窟一窟个腳跡，有深有淺
這一路行來个印跡，敢係若命底
斡頭，看轉去
一路就係笑笑

對面該條金那那个海岸線，識唱過渡臺悲歌
月光下个烏水溝，戙洗還係勸命毋贏个時代
心肝窟無哪敵个關，嘎同志氣打宕窿
阿婆个心事，流入洋洋洋洋个大海
還佬著做得撈轉阿公膠你講過个細話仔
阿公个身影，仰盼得跔等海鳥仔越飛越遠
分吹轉來个海風，凝出鹹纖¹个味緒

這種鹹嘎膠若面容滷到筋渣膜絡²
陣陣个海浪來去無準則，定定仔在若額頭
跔日隨月織出一條一條个皺紋
成時，激起田頭地尾煞猛个身影
成時，撐起家頭教尾做家个硬頸
默默仔做，像泥牛入海無聲無說
甘願將自家个命運，恬恬仔浸在歲月肚共老

企在海脣个老風車，捩轉番綻个年輪
膠你行過个人生，乜緩緩仔 捩落海
人生像海，風平浪靜有講毋出个望想
腦隔像海，恬風息氣有講毋忒个妄想
有成時像打潑賴个細亞仔，掙掙製製³
喬人講若無愛帶你去看海，就毋肯食藥仔
有成時像起猴面个細亞仔，一眨面
喁喁喁喁⁴ 謔謔滾⁵，膠自家个人生就喊恹哩

¹ 鹹纖：ham' xiam'；略帶鹹味。

² 筋渣膜絡：gin' za' mog log；形容十分消瘦，只見筋絡膜渣而不見肉的樣子。

³ 掙掙製製：diong' diong' cad` cad`；使性子，時要時而不要的方式向人要脅，以達目的。

⁴ 喁喁喁喁：ngiau`ngiau`ngiau`ngiau`；囉哩囉嗦或抱怨不斷的聲音。

⁵ 謔謔滾：ngiau ngiau gun`；形容怨聲不斷的樣子。

阿婆个人生有鹹有淡
鹹淡裡肚，乜有燦光晟入海
白白个浮雲，係佢个一抹笑容
藍丟丟个天，係佢个一領藍衫
加幾兩仔笑容，放入面頰添氣色
減幾兩仔愁慮，換轉天轉笠嫵花
跔海水，一漲一退
無輸無贏